

Frederi Mistral

Mi Rapugo
(1911)



Recampa pèr Reinié Jouveau

Escrivè lou baroun Guillibert

Quand maridè soun fiéu

La barounié di Guillibert
Longo-mai crèisse e reflourigue
E Santo Estello ié sourrigue
Emai l'Amour, nunc et semper

Escrivè lou libre de Charle Maurras

Les amants de Venise

L'Amour es un diéu vierge,
L'Amour viéu qu'en pantai
E, quand ié disès: t'ai!
Se brulo coume un cierge.

Escrivè la neissènço de Francés d'Esparbès

Au palais de Fountano-blau (29 de jun 1910)

Fountano-blau, rejouis-te:
Lou rèi Francés vèn de renaïsse.
Dóu la que gisclo dóu teté
En pas e glòri Diéu lou païsse!

Escrivè sus la porto d'un barbié

A Maiano

Quand te diguèsson Barbo-d'ase,
Intro mignot, vers Mourrinet
E, s'as besoun que te rase,
Auras lèu lou mourre net.

Escrivè sus la porto d'un courdounié

En Arle

Quau bèn se causso
De proun s'enausso
Car, fugue di sèns vous facha,
Lou tiro-pèd fai tout marcha.

Escriv sus l'aeroudromo de la Crau

A Miramas

Espandisse tis alo,
Mouto que mountaras:
Rèn de plus bèu veiras
Qu'en terro prouvençalo.

Escriv à Frederi Charpin qu'eu m'escrivé

Mantenen la lengo, bessai veiren Berro

Lou tout es que l'espèro
Nous tèngue risoulet:
Pièi, se noun vesèn Berro,
Saren pas li soulet!

Escriv pèr lou retra d'uno felibresso

(Aquarello de Lelée)

Antounieto de Seyno,
Empaches d'oublida
Qu'en Arle an saluda
Toujour li bèlli rèino.

Escriv pèr lou retra dóu pintre rússi Ivan Pranishnikoff

Que venié de mourir

De tu, que miés que res as pinta la Camargo,
As fa tout ço que fau pèr que nous souvenguen:
Un cor de Prouvencau batié soto ta jargo
E t'ères, miés que res, inserta Camarguen.

Escriv pèr li Miejournalen de Reno de Bretagno

Que la flour d'or di genestoun,
La flour di genestoun bretoun,
Vous rememòrie la genèsto
Que dóu bon Diéu eici flouris la fèsto.

Escri pèr lou Centenàri de Beatris
A Flourènço (1890)

O Dante, après tu que l'as visto amado,
E revisto en Diéu, ta roso enflamado,
Quau es, de clucoun, lou fol apendris
Qu'ausarié canta, vuei, ta Beatris ?

Escri pèr lou centenàri de Cristòu Couloumb
Sus l'Album de Milan 1892

Pèr expandi la terro e la bouta d'aploumb
Falié qu'un sant nasquèsse,
En tu, pèr aquéu grèu pres-fa, Cristòu Couloumb,
Dou ribeirés Ligour s'es encarna lou gèni.

Escri subre lou socle dóu buste de Berlu
A Fourcauquié

A Leoun de Berlu, lou flame e grand felibre
Que nòsti dre de pople libre
E l'ounour prouvençau aparè fermamen
Fourcauquié soun païs dreissè lou mounmnen.

Escri soutu l'image de la grando Esclarmoundo
Countesso de Mount-Segur (1236)

De longo Naturo reparo si perdo.
Lou germe de longo vesèn renadiéu:
Esclarmoundo trèvo dins la vau de Gerdo,
Reviéudon soun verbe Perbosc em' Estiéu.

Escri pèr uno Sourguenco
Que demandavo un coumplimen.

A Sorgo soun tóuti galanto,
Li chato acò 's bèn couneigu
E l'auceloun que se i'aplanto
Dins lou fielat i'es lèu tengu.

Escri souto un tablèu representant la vendèmi

Acò fai gau, de vendemia
Li bèu rasiñ que pènjo i souco:
Autant de grumo coume i'a,
Autant de poutoun pèr li bouco !

Ai vendemia dins moun jouvènt:
Vau mai vendèmi qu acadèmi.
Aro que lou vieiounge vèn,
Beve lou vin de ma vendèmi.

© CIEL d'Oc – Jun 2009